

Parlamentario Jeffrey Kelly:

Parlamento a trata e ley pa oficialisa e colornan di nos bandera

PARLAMENTO a trata den un reunion publico e ley pendiente tocante e landsverordening vlag, wapen en volkslied cu enfasis riba e hernieuwde vaststelling vlagkleuren y e proposicion pa haci e shoco un simbolo nacional.

Historia

Despues cu na 1977 a bini cu e vlagordening di Aruba caminda cu e forma y colornan di nos bandera a wordo hancra den ley na aña 1991 a cambia esaki pa landsverordening vlag, wapen en volkslied. A pesar di esaki nos a ripara cu durante ultimo añanan diferente tipo di color blauw ta wordo uza, specialmente ora cu tin actividadnan cultural of durante temporada di celebracion di dia di Himno y Bandera. Un di e ehempelnan cu por menciona ta esun di e banderinnan di auto. Parlamentario Kelly ta splica cu den e ley cu a wordo trata den Parlamento ta propone pa bin cu un punto central di benta di bandera di Aruba pa asina evita cu bo ta haya bandera of banderinnan di Aruba di diferente color blauw. Den e ley aki ta propone pa laga BID ta e centro cu ta encarga su mes cu e distribucion di e bandera di Aruba, mientras cu Departamento di Cultura lo encarga su mes cu dunamento di vergunning a base di reglanan cu ta aparece den ley.

E color

Tabatin discusion tocante e colornan di nos bandera. Den memorie van toelichting ta splica cu e color larkspur cu ta aparece den e "British Colour Council Dictionary of colour standards" no ta existi mas y pesey ta opta pa bai over na e Pantone Colour System Blauw PMS 279c, Cora PMS 032c, Geel PMS 109c y Blanco PMS absolute white.

Tratamento di e ley

Ta di lamenta cu ora a trata e ley aki, cu ta patrimonio di nos pais, caminda cu parlamento tabatin e oportunidad pa mostra pueblo cu por yega na otro a resulta lo contrario. Hiba un debate riba nivel no ta den diccionario di Mep. Parlamentarionan di Mep a dicidi pa bay hunga cu sintimento di pueblo y haci politica cu esaki. Otronan tabata fungi como cheerleader y grita insultonan den direccion di Minister Oduber.

Sr. Glembert Croes di fraccion di Mep tabata insisti pa den e ley referi na e color blauw uzando e termino "larkspur". Den e nota di cambio cu Minister a presenta na Parlamento

a añadi esaki den e ley, pero lamentablemente durante votacion Sr. Croes asina mes a dicidi di vota contra e ley aki.

Mocionnan y amienda

Durante e reunion Mep a bin cu un mocion, pero mirando cu e punto number 1 di e mocion ta papia tocante cambio di color di bandera, fraccion di AVP no a bay di acuerdo cu esaki. E reunion aki no tabatin como meta pa trata cambio di color, sino e oficialisacion y codificacion di e bandera. Fraccion di AVP a presenta un mocion y un amienda durante e reunion aki. E mocion tabata trata un "Natuurbeschermingsverordening" cu a wordo propone pa Sr. Dammers. Esaki tin como meta pa percura pa e Shoco cu ta simbolo nacional di Aruba haya su proteccion mas pronto cu ta posibel. E mocion aki a wordo aproba unanimamente pa Parlamento di Aruba. E otro mocion cu tambe a wordo presenta pa fraccion di AVP tabata trata cambionan chikito manera e palabra "Koningin" pa "Koning" y referi na e Shoco como simbolo nacional di Aruba. Esaki tambe a wordo aproba unanimamente. Parlamentario Kelly ta referi na e reunion aki

como uno historico, ya cu un tema cu pa hopi aña tabata wordo discuti riba dje a wordo atendi. Awo nos por ta sigur cu e uso di banderanan cu no ta cuadra cu e colornan original lo wordo limita y cu den futuro cercano nos pueblo lo ta uni bou di un bandera di colornan cu ta stipula pa ley.

Ausencia di e lider di MEP

Atrobe por a tuma nota cu ora di votacion lider di Mep no tabata presente. Lamentablemente nos tin cu constata cu esaki no ta nada nobo. E tin custumber di abstene di vota ora ta trata tipo di leyman cu ta hopi "gevoelig", manera tabata e caso tambe ora di vota pa e ley di "politieke ambtsdragers". Kisas tin otro cosnan cu pa e lider di Mep ta mas importante na e momentonan aki. Sigur mirando e echo cu ultimo simannan tin varios articulo cu a wordo publica den medianan di comunicacion referiendo na transaccionnan dudosos cu e lider di Mep por ta involucra aden.

